

Årsmelding Vestland SV 2025-26

Året oppsummert

2025 var eit år prega av valkamp og difor eit høgt aktivitetsnivå. Mange lokallag leverte eit imponerende omfang av valkampaktivitetar og for fyrste gong vart dørbank rulla ut i stor skala. Målt i tal aktivitetar var 25-valkampen ein av dei aller beste me har levert, likevel vart dessverre valresultatet langt dårlegare enn kva me håpa og trudde på byrjinga av året.

Ved starten av fjoråret var partiet i ein god strategisk posisjon, hadde rundt 10% på snittet av målingane og fleire målingar med to inne frå Hordaland. Som einaste budsjettpartner utanfor regjering, fekk me vist fram gjennomslaga våre og var interessante for media. Me fekk gjennom viktige lokale saker som Arna-Stanghelle og Griegakademiet slik at alt skulle liggje til rette for eit godt valresultat. Situasjonen vår endra seg dramatisk då Senterpartiet gjekk ut av regjering og sett i bakspeglene er det tydeleg at partiet ikkje klarte å tilpasse seg den nye røynda. Dette, saman med at partiet ikkje klarte å levere tydelege spisse valkampsaker, er truleg mellom hovudårsakene til valresultatet vart langt unna kva me såg føre oss ved starten av året.

Takka vere stor innsats frå tillitsvalde og tilsette, har laget levert på mange av måla som vart sett på sist fylkesårsmøte. Me hadde ein synleg og godt samsnakka delegasjon på landsmøtet, det har vore gjennomført to valkampar med svært høgt aktivitetsnivå, laget har sett opp ei lang rekkje skuleringar både i samband med valkampen og for tillitsvalde, dei politiske utvala har stått for mykje aktivitet og mange interessante møte og mykje meir som du kan lese om på dei neste sidene. Alt dette skal me vere godt nøgde med.

Samarbeidet i fylkesstyret og arbeidsutvalet er godt og me har opne diskusjonar i ein god tone. Oppmøtet er jamt over godt og medlemmane i styret har lagt ned ein stor innsats gjennom året.

2025 vart eit meir arbeidssamt og tidvis krevjande år enn kva det trong ha vore. For å spare lønnsutgifter og frigje meir midlar til valkamp, vedtok fylkesårsmøtet 2025 å ikkje hente inn vikar medan fylkessekretæren var i foreldrepermisjon. Dette var ei svært uheldig avgjerd som sette laget i ein krevjande posisjon og som dei av oss som var involverte må ta sjølvkritikk for og lærdom av. For få tilsette i ein svært travel periode med førebuing av landsmøtet og planlegging av valkampen, gav ei for uforsvarleg høg belastning for den tilsette og sentrale tillitsvalde. Det førte til at oppfølginga av fylkesårsmøtet tok lenger tid enn den burde, at det tok lenger tid enn ynskjeleg å stable på beina satsingar i arbeidsplanen og at førebuingane til

valkampen i Hordaland kom på etterskot. For å rette feilen, henta me inn ein vikar frå midten av mars og ut foreldrepermisjonen. Lønnsutgiftene til vikaren er ei av hovudårsakene til at me legg fram ein rekneskap med større underskot enn budsjettet.

Årsmeldinga du no les er på eit litt anna format enn kva du er van med. I staden for ei opplisting av kva som er gjort det siste året, har me gått gjennom arbeidsplanen punkt for punkt og svara ut kva som er levert på kvart av måla. Slik håpar me at det vert lettare for årsmøtet å sjå korleis fylkeslaget har jobba med måla i planen og me håpar det er nyttig når de no skal revidere arbeidsplanen.

Måloppnåing og gjennomføring av arbeidsplanen

Sist fylkesårsmøte sette følgjande mål for Vestland SV:

1. Fleire og meir aktive medlemmar
2. Godt skulerte tillitsvalde, folkevalde og kandidatar
3. Eit solid og veldrive fylkeslag
4. Aktive utval som bidreg til politikktutvikling og medlemsaktivitet
5. Godt samarbeid med Sosialistisk Ungdom

Delmål: Meir aktive medlemmar

Målet var meir aktive medlemmar som veit kor viktige dei er for valkampen vår og at dei må oppmodast og støttast til å halde SV-fana høgt.

Tiltak		Gjennomføring	Ansvar
1	Alle medlemmar i fylkeslaget skal ringjast før valkampen og få informasjon om korleis dei kan bidra anten aktivt eller ved å flagge standpunkt.	Før sommaren 2025 og 2027	Lokallaga (gjennomføre ringing) og fylkesstyret.
2	Alle nye medlemmar skal verte kontakta for å ynskjast velkomen og inviterast på ein aktivitet.	Kontinuerleg	Lokallaga (gjennomføre ringing) og fylkesstyret

Tiltak		Gjennomføring	Ansvar
3	Alle nye medlemmar skal i løpet av det fyrste halve året bli inviterte med på medlemsaktivitet, som til dømes «Velkomen til SV»-møte. Dersom medlemmen kjem frå ein kommune utan SV-lag kan dei kopløst på eit nærliggjande lokallag.	Kontinuerleg	Lokallaga og fylkesstyret (for medlem utan lokallag)
4	Lokallaga skal invitere medlemmar frå kringliggjande lag på medlemsaktivitetar	Kontinuerleg	Lokallaga

Status for desse tiltaka:

Fylkesstyret har kontakta alle lokallag med oppmoding om å organisere ringing av alle medlemmar før valkampen. For dei lokallaga som har hatt behov for bistand til dette, har dette vore følgd opp av Fylkesstyret.

Lokallaga vart samstundes oppmoda om å ha planlagd ein konkret aktivitet å invitere inn til, før dei gjennomførde ringerunde, og til “Velkomen til SV møte”.

Medlemmane i Fylkesstyret har hatt faste lokallag å følge opp innanfor felles geografiske område. Det har gitt høve til å fange opp og oppmode til kontakt mellom lokallag, der det har vore behov for og ynskje om det. Og kor det har vore invitert til arrangement på tvers av kommunane.

Delmål: Passere 2250 medlemmar innan utgangen av 2025

Målet var å passere 2250 medlemmar innan utgangen av 2025. Per 31.12.24 var det 2139 medlemmar i Vestland SV.

Tiltak		Gjennomføring	Ansvar
1	Vestland SV skal følgje opp nasjonale vervekampanjar	Når det kjem frå sentralt	Fylkesstyret, fylkessekretæren
2	Vestland SV skal lage eigne lokale tiltak for å verve medlem i heile Vestland.	Etter valet og i 2026	Fylkesstyret
3	Vestland SV skal vere til stades på viktige arrangement til organisasjonar og rørsler me har samanfallande interesser med. Utvala skal lage oversikt over prioriterte alliansar på sitt felt, og forslag til korleis fylkeslaget kan arbeide saman med desse.	Etter valet og i 2026	Utvala

Status for desse tiltaka:

Vestland SV hadde god medlemsvekst i valåret 2021, og ende året med 2206 medlemmar. I åra sidan har medlemstalet tendert nedover. Ved utgangen av 2024 hadde me 2139 medlemmar, og sjølv etter valåret 2025 har me hatt ein netto nedgang i medlemmar, til 2059 medlemmar. Alle fylkeslag i SV reduserte medlemstalet samanlikna med 2024, og nasjonalt gjekk me frå 16 240 medlemmar i 2024 til 15 688 i 2025.

Vestland SV har hatt som mål i arbeidsplanen å passere 2250 medlemmar innan utgangen av 2025. Det talet er ikkje nådd, og ei viktig oppgåve framover er å stabilisere og så auke medlemstalet.

Delmål: Fleire lokallag skal få høve til å senda to delegatar til årsmøtet

Målet for perioden var at minst 5 lokallag med færre enn 30 medlem skulle få meir enn 30 medlemmar.

Tiltak		Gjennomføring	Ansvar
1	Vestland SV skal hjelpe små lokallag med organisasjonsbygging. T.d. kursing av tillitsvalde og økonomisk bidrag til lokallag med få medlemmar.	I mellomvalår	Fylkesstyret
2	Vestland SV skal legge til rette for bruk av alle digital verktøy tilbyd av SV-sentralt for å styrkje aktiviteten i lokallaga.	Våren 2025	Fylkessekretæren

Status for desse tiltaka:

Fylkesstyret har følgd opp lokallaga på kontingent- og medlemsringing generelt, og spesielt for dei med høve til å jobbe for to delegatar til fylkesårsmøtet.

Fylkesstyret gjennomførte eit seminar i Florø den 28. september. Alle laga i ytre Sunn- og Nordfjord var inviterte, men berre Kinn deltok. Tema var å leie eit lokallag, aktivitetar i lokallaget, medlemsoppfølging, lokallaget og politikken. I tillegg vart det diskutert strategiar for vidareutviklinga av lokallaget.

Sentralleddet i partiet tilbydde kursing i zetkk.in som lokallaga vart oppmoda til å delta på.

Delmål: Meir mangfaldig representasjon i fylkeslaget

Målet var å nå ut til fleire minoritetar, og få dei til å bli medlemar og aktive i partiet. Me lyt nå ut til fleire unge vaksne, og fagorganiserte, spesielt i distriktslaga våre.

Tiltak		Gjennomføring	Ansvar
1	Fylkesstyret skal saman med utvala og lokallaga arbeide for å finne kandidatar med bakgrunn frå underrepresenterte grupper.	Årleg før års- og nominasjons-møta	Fylkesstyret, utvalsleiarane, lokallaga
2	Vestland SV skal vere til stades på viktige arrangement til organisasjonar og rørsler me har samanfallande interesser med. Fylkeslaget skal særleg prioritere arrangement som rettar seg mot minoritetar og andre grupper me ynskjer å tiltrekkje oss.	Kontinuerleg	Fylkesstyret, utvala

Status for desse tiltaka:

Vestland SV har ved inkluderingspolitisk utval delteke på møter arrangert med Islamsk Råd i Bergen, me har vore på minnemarkering for Tamima i Bergen, eit arrangement i regi av Oromo-forbundet i Bergen og markering av Eritreas uavhengigheitsdag i Bjørnafjorden.

Under valkampen var aktivistar i Bergen synlege med vårt budskap om Gaza og oljefondet hjå og utanfor muslimske forsamlingar. Der var me veldig velkomne, både med innlegg inne i lokalet og løpeseddelstand utanfor.

Inkluderingspolitisk utval hadde også valstand på Bergen Inkluderingscenter på Landås og gjorde eit godt arbeid med å snakke om vår politikk og valdeltaking generelt.

Mål: Godt skulerte tillitsvalde, folkevalde og kandidatar

Ei av prioriteringane til Vestland SV var å skulere tillitsvalde, folkevalde og kandidatar. Alle lokallagsleiarar og fylkesleiarar skal gjennomføra grunnskulering for tillitsvalde og få tilbod om vidare skulering med fokus på rolla som leiar og utvikling av SV som organisasjon. Skuleringstilbodet i Vestland SV skal vere systematisk og pågåande.

Status for desse tiltaka:

Fylkesstyret utarbeidde skuleringsplan for 2025 fram til årsmøtet 2026. Skuleringane for våren 2025 vart planlagd ut frå valkamp, og alle lokallaga i Fylkeslaget vart invitert til å delta digitalt.

Valkampskulering:

- 28.04 SV på 1-2-3 for nye medlemmar med Lars Haltbrekken
- 20.05 Sosialpolitikk (barnetrygd/barnehage/SFO/bustad/profittfri velferd)
med Freddy Øvstegård
- 28.05 Sosialpolitikk (tannhelse) med Marian Hussein
- 04.06 Våre gjennomslag med Audun Herning og Steinar Nørstebo
- 11.06 Natur, klima og samferdsle med Jarle Brattespe
- 17.06 Sikkerheitspolitikk med Ingrid Fiskaa

Etter valet vart det lagt inn to regionale skuleringar med fysiske samlingar. Tema for desse skuleringane var å leie et lokallag, aktivitetar i lokallaget, medlemsoppfølging, lokallaget og politikken.

28.-29.09 i Florø og Førde

25.-26.10 på Norfjordeid, vart avlyst grunna få påmelde.

Det var og i skuleringsplanen lagt inn skulering med tema budsjettarbeid i kommunar med og utan finansutval.

Skulering for kasserarar i praktisk rekneskap og budsjett var gjennomført 26. november av Asle Olsen. I samband med dette vart det delt ut skuleringsopplegg og malar til arbeid med budsjett og rekneskap for lokallag.

Delmål: Godt skulerte tillitsvalde som er trygge i rolla si

Målet var at alle tillitsvalde i løpet av valperioden skal gjennomføra SV sin grunnskulering for tillitsvalde.

Tiltak		Gjennomføring	Ansvar
1	Fylkesstyret skal delta på årlege skuleringar, gjerne i samarbeid med sentralt	Årleg	AU
2	Vestland SV skal invitere alle lokallagsleiarar/bydelslagsleiarar/styremedlem til skulering ein gong i halvåret. Skuleringa kan vere digitalt eller med fysisk møte.	Frå 2026	Fylkesstyret

Status for desse tiltaka:

Fylkesstyret gjennomførte felles skulering på styresamlinga 1. og 2. mars. Folkevaldsansvarleg Jørgen Hammer Skogan bidrog til skuleringa. I tillegg har dei fleste i styret gjennomført partiet si e-læring om styret sitt ansvar.

Organisatorisk nestleiar Eva Mikkelsen har gjennomført digitalt kurs i styret sitt juridiske ansvar. Kvinnepolitisk leiar Erle Liliane Wesenlund har gjennomført formøteskulering med KPU sentralt og eit møte om styrearbeid i mars. Politisk nestleiar Vibeke Johnsen har gjennomført fleire kandidatsamlingar, strategisamling og styreskulering saman med fylkesstyret. Leiar Jarle Brattespe har delteke på samlingar og skulering i arbeidsleiing og arbeidsgjevansvar med partikontoret og dagleg leiar i SV, Eli Ulvestad. Den 6. mars var det eit digitalt arbeidsleiarkurs for fylkesleiarar og den 22. og 23. november var det ei fylkessamling i Oslo med mellom anna leiarkursing, erfaringsutveksling mellom fylkesleiarane og kursing om arbeidsleiarrolla og den nye arbeidsmiljølova.

Delmål: Godt skulerte folkevalde som deler erfaringar seg imellom

Målet var at folkevalde skal ha tilbod om oppfølging og erfaringsdeling gjennom fireårsperioden.

Tiltak		Gjennomføring	Ansvar
2	Vestland SV skal arrangere to folkevaldsamlingar (digitale og/eller fysiske) årleg.	Årleg	Fylkesstyret, folkevaldsansvarleg
3	Vestland SV skal arrangere digitale erfaringsmøte for eineståande folkevalde 2-4 gonger i halvåret.	Årleg	Fylkesstyret, folkevaldsansvarleg
4	Folkevalde som høyrer til ei minoritetsgruppe skal kontaktast av ein 'fadder' med erfaring som folkevald, som kan bistå og støtte ved høve.		

Status for desse tiltaka:

I 2025 vart det gjennomført eit digitalt møte for folkevalde i Vestland. Tema for møtet var budsjett. Det var ikkje gjennomført egne møter for eineståande folkevalde i løpet av 2025.

Det vart sett ned ei gruppe som arbeida med rutinar for oppfølging av folkevalde som høyrer til ei minoritetsgruppe. I løpet av dette arbeidet har det kome fram at me med omsyn til personvern ikkje har høve til å samla ein oversikt over personar som høyrer til ei minoritetsgruppe. Det vert difor arbeida med andre rutinar for å nå dette målet.

Mål: Eit solid og veldrive fylkeslag

Måla var å styrkje økonomien i laget, styrkje samarbeid og informasjonsutveksling mellom ulike organisasjonsledd og å arbeide meir effektivt og målretta.

Delmål: Styrkje økonomien i fylkeslaget

Målet var å styrkje økonomien, og økonomiarbeidet i fylkeslaget, styrkje lokallaga sitt økonomiarbeid og at lokallaga ikkje står aleine om økonomiarbeidet.

Tiltak		Gjennomføring	Ansvar
1	Informasjon om korleis ein vert givar via frivillig- kontingent ordninga skal være enkelt tilgjengeleg på Vestland SV og lokallagas nettsider.	Når ordninga for frivilligkontingent er klar	Fylkes-sekretær
2	Fylkeslaget skal følgje opp lokallaga sin praksis med partiskatt, og sørge for at partiet sine vedtektene følgast.	Kontinuerleg	Kasserar og fylkes-sekretæren
3	Kandidatane skal gjerast kjent med partiskatt før nominasjonsmøta.	Før nominasjons-møta	Valnemndene for fylkes- og lokalvala
4	Det skal utarbeidast skuleringsopplegg i økonomistyring og regnskapsføring for lokallag.	Våren 2025	Kasserar og fylkes-sekretæren

Status for desse tiltaka:

På grunn av det skuffande valresultatet mottek partiet sentralt lågare partistøtte og måtte redusere budsjettet med til saman 8 millionar. For å klare dette gjekk partikontoret gjennom ein nedbemanningsprosess. Fylka vart i stor grad skåna for nedskjæringar, men avtalen om sentral medfinansiering av organisasjonskonsulent-stillinga vart reforhandla slik at fylkeslaget no dekkjer ein litt større del av lønnskostnadene.

Partiet sentralt har etablert ei ordning for gåver via vipps, denne er synt til på Vestland SV sine nettsider. Dette har gitt ei solid auke i gåver og faste gjevarar, frå fyrste til andre halvår.

Fylkessekretæren har informert alle folkevalde i fylket om rutinar for partiskatt. Det har i 2025 ikkje vore prioritert å fylgje opp samtlege lokallag med tanke på partiskatt. Dette vil måtte løftast opp meir fram mot nominasjonsprosessane for lokalvalet i 2027.

Lokallaga har vorte invitert til to kurs i økonomiarbeid.

Delmål: Styrkje lokallag med få aktive medlem

Målet var å styrkje små lokallaga med få aktive medlemmar.

Tiltak		Gjennomføring	Ansvar
1	Fylkesstyret skal setje ned eit utval som skal finne eigna tiltak for å styrkje dei små lokallaga.	Etter valet	Fylkesstyret

Status for desse tiltaka:

Fylkesstyret sette ned eit utval som har bestått av desse medlemmane:

Eva Mikkelsen frå Fylkesstyret, leiar, Silje Nordtveit Olsen frå Fylkesstyret, Arild Høyland frå Sveio SV og Grete Berntzen frå Bremanger SV.

Utvalet sendte ut ei spørjeundersøking til lokallag med færre enn 60 medlemmar, altså 25 lokallag. 4 av desse laga svarte, og gav nyttige meldingar til utvalet.

Innspela som kom inn gjekk i hovudsak på desse forslaga:

- minimum ei fysisk samling i året
- samlingane bør leggje til rette for at ikkje berre leiar men og heile styret kan delta
- korleis leggje opp arbeidet i styret
- korleis aktivere medlemmar
- viktige saker for SV
- praktisk øvingskurs i å argumentere for SV sin politikk
- kommuneøkonomi
- distriktpolitikk
- korleis jobbe når ein er åleine i kommunestyret
- utvikle ressursbanken
- Fylkesstyret sin støttefunksjon

Innspela er tekne med i arbeidet med revidert arbeidsplan, og skal inn i Fylkesstyret sitt arbeid med operasjonalisering av arbeidsplanen som vert vedteken på Fylkesårsmøtet 2026.

Delmål: Godt samarbeid mellom fylket og lokallaga og lokallag imellom

Målet var eit godt samarbeid med lokallaga, og lokallaga seg imellom, god informasjonsflyten og at lokallaga deler gode døme og idear slik at me kan lære av kvarandre.

Tiltak		Gjennomføring	Ansvar
1	Arbeidsutvala i Vestland og Bergen SV skal ha to årlege møter for å snakke om saker som rører begge partar, til dømes å koordinere arbeid, drift og dei tilsette sine arbeidsforhold.	To gongar i året	AU
2	Fylkesstyret skal syte for å arbeide for samarbeid mellom geografisk nære lokallag, til dømes gjennom regionale samlingar og skuleringar. Tillitsvalde skal ha kontakt med og lære av kvarandre.	I mellomvalår	Fylkesstyret
3	Vestland SV skal fremje vellukka dømer frå arbeid i lokallaga som andre lokallag i fylket kan få inspirasjon frå. Lokallaga skal melde inn til fylkeslaget gode døme på gjennomførte arrangement, politiske gjennomslag og liknande.	Kontinuerleg	Fylkesstyret og lokallaga

Status for desse tiltaka:

Det vart helde eit felles AU-møte med Bergen SV den 18. november. Tema på møtet var arbeidsplanar, dørbank og programarbeid, økonomi, arbeidsgruppe for kontorlokale, tilslutning til arrangement og prosessen fram mot nytt prinsippprogram.

Fylkesstyret har delt lokallaga inn i følgjande regionar: Nordfjord, Sunnfjord og ytre Sogn, indre Sogn, Bergensområdet, Voss og Hardanger, og Sunnhordland. To styremedlem har fått i oppgåve å følgje opp lokallaga i kvar region og deler oppgåva med å ringje lokallaga. Lokallaga i regionane har vorte oppfordra til å samarbeide og til å invitere medlemmer frå kringliggjande lag på aktivitetar. Det har i tillegg vorte arrangert regionale skuleringar i Florø og Førde og var planlagt ei samling på Nordfjordeid som vart avlyst på grunn av få påmelde.

Det har ikkje vorte sendt inn døme på vellukka arrangement frå lokallaga og det har heller ikkje vorte særleg etterspurt.

Delmål: Nytte digitale verktøy til å jobbe smartare

Målet var at alle mellomstore lokallag skal nytte Zetk.in.

Tiltak		Gjennomføring	Ansvar
1	Fylkesstyret skal kontakte alle lokallag med 50 eller fleire medlem og oppmode dei til å nytte Zetk.in	Våren 2025	Fylkesstyret
2	Fylkeslaget skal leggje til rette for at så mange lokallag som mogleg skal ta i bruk Zetk.in og andre digitale verktøy SV sentralt tilbyr, til dømes ressursbanken.	Våren 2025	Fylkesstyret og fylkessekretæren
3	Organisasjonen skal skulerast i Zetk.in som er eit mobiliserings- og organiseringsverktøy kor ein kan organisere og melde seg på aktivitetar.	Våren 2025	Fylkesstyret, fylkessekretæren

Status for desse tiltaka:

Fylkeslaget har oppmoda lokallaga til å delta på kurs i zetkin og formidla informasjon om korleis ein melder seg på. Ein har i løpet av året ikkje prioritert å legge stort press på laga, men fyrst og fremst brukt gulrot. Per i dag er det for fylkeslaget kjent at zetkin er i bruk i stort eller mindre omfang i Bergen SV, Askøy SV, Øygarden SV, Sunnfjord SV og Sogndal SV. Det er altså eit stykke igjen til at alle store og mellomstore lag har teke i bruk verktøyet og metodikken.

Delmål: Arbeidsplanen skal vera eit arbeidsdokument for fylkesstyret som sikrar at dei gjennomfører det årsmøtet ynskjer

Tiltak		Gjennomføring	Ansvar
1	Fylkesstyret skal, kort tid etter fylkesårsmøtet, samlast for å operasjonalisere måla i planen. Fylkesstyret skal prioritere kva mål som skal gjennomførast fyrst og sist, tidfeste gjennomføringa av måla for året, konkretisere måla til handfaste oppgåver og fordele oppgåvene mellom medlemmane i styret.	Innan utgangen av mars 2025	AU (leggje rammer), fylkesstyret

Status for desse tiltaka:

Det nyvalde fylkesstyret hadde ei strategisamling helga 1. og 2. mars der arbeidsplanen vart gjennomgått og dei ulike tiltaka konkretisert og tidfesta. Tiltaka vart lagt inn i årshjulet, med oppfølging i AU- og Fylkesstyremøta, saman med skuleringsplanen.

Mål: Aktive utval som bidreg til politikkutvikling og medlemsaktivitet-

Målet var å ha kvinnepolitisk-, miljøpolitisk-, fagleg-, distriktpolitisk-, internasjonalt- og inkluderingspolitisk utval og å starte opp eit landbrukspolitisk nettverk. Det var også eit mål å ha ei breiast mogleg forankring i ulike miljø og i heile fylket og at utvala skal være mangfaldige og representere heile fylket.

Tiltak		Gjennomføring	Ansvar
1	Fylkesstyret set ned utvala og skal være delaktig i å rekruttere nye medlemmar.	Ikkje meir enn to månader etter årsmøtet	Fylkesstyret, AU, utvalsleiarane
2	Lokallaga skal hjelpe til med å leite etter gode kandidatar til utvala	Rett etter årsmøtet	Alle årsmøteutsendingane
3	SU skal inviterast til å melde inn kandidatar til utvala	Rett etter årsmøtet	AU og fylkessekretæren
4	Fylkesstyret skal i samråd med utvalsleiarane vedta mandat for og forventingar til kvart utval.	Ikkje meir enn to månader etter årsmøtet	Utvalsleiarane og fylkesstyret

5	Utvala skal bidra til politikktutvikling gjennom å levere innspel og fråsegner til fylkesstyret, fylkesårsmøtet, programarbeid og andre relevante prosessar i partiet.	Kontinuerleg	Utvalsleiarane
6	Utvala har ansvar for å halde kontakt med relevante rørsler innan utvalet sitt felt	Kontinuerleg	Utvalsleiarane
7	Utvala har ansvar for å markere relevante merkedagar og bidra til mobilisering før desse.	Kontinuerleg	Utvalsleiarane
8	Utvalsleiar skal oppdatere fylkesstyret på kvart fylkesstyremøte	Kontinuerleg	Utvalsleiarane
9	Politisk nestleiar skal ha oversikt over aktiviteten i utvala og skal hjelpe utvalsleiarane å utøve mandatet sitt.	Ved behov	Politisk nestleiar

Status for desse tiltaka:

Kvinnepolitisk, miljøpolitisk, fagleg, distriktspolitisk og inkluderingspolitisk utval vart sett ned på fylkesstyresamlinga 1. mars. Alle utsendingane til fylkesårsmøtet vart oppmoda om å hjelpe til med å leite etter gode kandidatar til utvala og lokallaga vart også oppmoda om dette per e-post, likevel kom det inn få forslag. Hadde det kome inn fleire forslag frå lokallaga, kunne utvala hatt ein breiare geografisk representasjon.

Me mangla leiarar til to av utvala, internasjonalt utval og funkisnettverket, og desse vart difor ikkje nedsett i mars. Pål Halle tok på seg å leie internasjonalt utval og utvalet vart sett ned av fylkesstyret 12. Juni. Me klarte dessverre ikkje å få i gang aktivitet i funkisnettverket. Det vart heller ikkje oppretta eit landbrukspolitisk nettverk i Vestland SV, men partiet sentralt har etablert eit nettverk.

Alle utvala diskuterte seg fram til mandat og forventningar for utvalet som vart vedteke av Fylkesstyret. Dette er utvalet sin arbeidsplan som syner kva utvalet ynskte å jobbe med det komande året utover oppgåvene som er gjeve av Vestland SV sin arbeidsplan. SU

Arbeidet i utvala vil verte følgd opp det neste året, med tanke på å støtte opp under opne aktivitetar for å få fleire aktive medlemmar og rekruttering av nye.

Kvinnepolitisk utval

Kvinnepolitisk utval har i år hatt 7 digitale møter og 1 fysisk møte i Bergen.

Me arrangerte eit arrangement om abortlova under kvinnefestivalen.

I dei digitale møta har me hatt besøk av CARE Norge og Maria Bonita Igland leiar av det nasjonale Kvinnepolitiske utvalet i SV.

På det fysiske møtet vårt fekk me besøk av Aldri Alene og Aleksander Papas, og hadde eit lærerikt og samlande møte.

I 2025 skulle utvalget:

- Halde seg oppdatert og informert på feministiske saker
- Fremje kvinnesaker i bygd og by
- Halde kontakt med utvalet sentralt
- Jobbe med fråsegner fram mot fylkesårsmøte

Utvalet har bestått av Erle Liliane Wesenlund (Ullensvang, leiar), Johanne Helene Strømseng (Bergen, nestleiar), Inger Johanne Bakke (Bergen), Eva Aarskog (Øygarden), Elin Hege Lona (Bergen), Sigrid Halvorsen (Askøy), Anna Kathrine Eltvik (Bergen) og Sidsel Lyster (Bergen)

Miljøpolitisk utvalg i 2025

Jamfør arbeidsplanen er fylgjande tiltak gjennomført:

Pkt. 1, 2,4 ok, pkt 3. gjennomførast på nytt. Pkt 5. Er utført, men kunne vore betre. Pkt 6. Kontakt med Naturvernforbundet heldt fram, samt kontakt med institusjonar og føretak innan miljøfeltet. Pkt 7. Verdens miljødag glippa me på men fekk til alternativ og pkt 8. og 9. er gjennomført.

Me har gjennomført tre *interne digitale* møter i utvalget. Eit møte i januar om fråsegner og drøftingar om aktivitet. Eit i mai om mandatet til utvalet og planlegging av vidare aktivitet, og eit evalueringsmøte i november om valkampen, statsbudsjettet og møta gjennomført tidlegare i året.

Utvalet har arrangert tre utadretta møter med både fysisk oppmøte og streaming, med litt ulikt oppmøte.

I februar; rovdyrseminar, juni hadde utvalet seminar om oppdrett og i november eit møte om sjeldne jordartar og fjorddeopi i Førdefjorden.

Utover dette har utvalet halde høgt aktivitetsnivå med deltaking i bedriftsbesøk, møter og konferansar og bidrege med innspel til høyringar og statsbudsjettforhandlingar.

I mandatet har MPU også ansvar for kontakt med miljørørsla. Jens deltek i Naturvernforbundet i Hordaland og rapporterer jamnleg til MPU fra desse møta.

Utvalet har bestått av Jens Revold (Bergen, leiar), Hallvard Birkeland (Bergen), Elena Dekhtyareva (Vaksdal), Ketil Christensen (Bergen), Einar Svendsen (Askøy), Ole

Marius Folkestad (Sogndal), Kerim Niancioglu (Bergen), Guttorm Fjose (Stord) og Eldrid Skudal (Sunnfjord)

Fagleg utvalg

Fagleg utval har i 2025 arbeida for å styrke Vestland SV sitt faglegpolitiske arbeid og vidareutvikle samarbeidet med fagforeiningane i fylket. Utvalet har gjennomført tre møter i laupet av året. Møta har vore prega av gode diskusjonar og engasjement, men utfordringar med å finne felles møtepunkt gjorde at utvalet ikkje fekk gjennomført det planlagte digitale nettverksmøtet med innleiar.

Utvalsleiaren har representert utvalet på viktige møteplassar i fagrørsla, blant anna på LOs regionkonferanse og LO Vestland sin faglegpolitiske konferanse.

Dette har bidrege til å halde god kontakt med fagrørsla og henta inn nyttige innspel til SV sitt politiske arbeid.

Eit viktig satsingsområde i 2025 har vore å styrke og formalisere samarbeidet med fagforeiningane. Utvalet har arbeida med eit forslag til samarbeidsavtale med Skolenes Landsforbund Vestland (SL), med mål om å etablere ein fast struktur for fagpolitisk dialog. Og følgd opp samarbeidet med Fagforbundet Vestland, der Vestland allereie har ein gjeldande samarbeidsavtale.

Utvalet har bestått av Knut Remi Heimvik (Bergen, leiar), Torstein Gya (Bergen), Karl Joachim Svendsen (Stord), Jorge Del Pino (Stord), Einar Wesenlund (Ullensvang), Gunnhild Helle (Bergen), Ellen Marie Blix (Bergen), Steinar Nørstebø (Bergen), Tord Kvale (Bergen), Ryhs Engevik (Bergen)

Inkluderingspolitisk utval

Det vart gjort nokre forsøk på å ta kontakt med personar med minoritetsbakgrunn som kunne vere aktuelle kandidatar, utan hell. Årsaker til at folk ikkje ynskja å stille var ulike, blandt anna lite tid, andre forpliktingar eller at dei ikkje ynskja politiske verv no. Derfor gav arbeidet ikkje konkrete resultat i 2025. Erfaringa viser at rekruttering av nye kandidatar krev meir tid, betre oppfølging og langsiktig arbeid.

Inkluderingspolitisk utval har samtidig delteke på fleire arrangement retta mot minoritetar og andre grupper partiet ynskjer å nå. Utvalet deltok blant anna på møte arrangert av Islamsk Råd i Bergen, minnemarkering for Tamima i Bergen, arrangement i regi av Oromo-forbundet i Bergen, markering av Eritreas uavhengigheitsdag i Bjørnafjorden og Pride-markering i Bjørnafjorden. I tillegg hadde Vestland SV valstand på Bergen inkluderingscenter, der me snakka med personar med minoritetsbakgrunn om politisk deltaking, demokrati og val.

Å vere tilstades her har gjort Vestland SV meir synleg og bidrege til dialog og kontakt med relevante miljø.

Utvalet har bestått av Milkissa Wodajo (Bjørnafjorden, leiar), Anders Listhaug (Bergen, nestleiar), Claire Folk Dracup (Bergen), Stig Ove Sæthre (Voss), Silje Heltne (Bergen), Camilla Grønning (Bergen), Toril Lussand (Bergen), Liv Endresen (Luster), Marit Tveito Askeland (Voss), Egil Kaberuka Nielsen (Bergen), Erna Sofie Jøsedal (Bergen), Yvonne Nshimirimana (Sogndal), Dag Lothe (Bømlo) og Oddvar Fosså (Bergen).

Distriktpolitisk utval

Det har vore avhalde 5 digitale møter i utvalet. Med dialog mellom, før og etter møta. Utvalet har jobba med fråsegner men har nok bite over for mykje i intensjonen og fråsegnene har ikkje gått utanfor utvalet.

Utvalet ha mål om at bør vere ei samling for Vestland SV det eine tema bør vere Distriktpolitikk. Utvalet jobbar og mot eit Distriktpolitisk Manifest som me ynskjer kan vere eit styringsdokument i åra som kjem.

I 2025 skulle utvalet:

- Sjå på moglegheita for å arrangere eit
- Halde løypande kommunikasjon i utvalet
- Ha formulert et x anfall forslag til fråsegner eller lesarinnlegg for toppkandidatane – alternativt prøve å få dette inn i lokale media/SoMe.

Utvalet har bestått av Kai Øystein Søvde (Luster, leiar), Steinar Sæther (Ullensvang), Trygve Solberg (Eidfjord), Bjørn Kåre Engseth (Eidfjord), Jan Per Styve (Bergen), Karen-Hilda Kloster (Kvinnherad), Nils Magne Blålid (Stord), Marit Tveito Askeland (Voss), Elisabeth Croles (Kvinnherad) Einar Skogseth (Bergen) og Siv Emdal (Stad).

Internasjonalt utval:

Utvalet har gjennomført to møter (av fire planlagte), der det fyrste var dedikert til å bli kjent og legge planar for året. Møte to vart brukt til å legge planar for eit opent møte om internasjonal skattepolitikk som skal arrangerast i mars 2026, samt utarbeide ei fråsegn om fredsforskning som vart oversendt fylkesstyret.

Utvalsmedlemmer har halde appellar på to arrangement i Bergen, knytta til Iran og Kurdistan.

Utvalet har bestått av Pål Halle (Bergen, leiar), Audun Syltevik (Bergen, nestleiar), Morten Heslein (Bergen), Tor Halvorsen (Bergen), Zohar Malamant (Bergen), Elias Gaassand (Bjørnafjorden), Liv Marit Longva (Bergen) og Knut Fjellheim (Askøy).

Mål: Godt samarbeid med Sosialistisk Ungdom

Delmål: Eit godt samarbeid med Sosialistisk Ungdom

Tiltak		Gjennomføring	Ansvar
1	Fylkesleiar skal to gongar i året invitere til samarbeidsmøte mellom leiinga i Vestland SV og Vestland SU. Dersom det er naudsynt blir det teke initiativ til fleire. Utover dette skal leiinga søkje å halde god kontakt og informere kvarandre.	To gongar i året	Fylkesleiaren
2	SU deltek på fylkesårsmøta med si eiga kvote og har også eigne representantar i ulike nemnder og i utvala. I tillegg vert Vestland SU inviterte til seminar og samlingar i Vestland SV. Dette er viktig for å bli kjent med kvarandre, dele erfaringar og å lære av kvarandre.	Ved høve	Fylkesstyret, SU
3	Gje SU-medlemmar i distrikta som t.d. ikkje har lag i kommunen sin høve til å velje å vera aktiv i sitt lokale SV-lag. Vestland SU skal informere lokallaga om SU-medlem utan SU-lokallag.	Kontinuerleg	Fylkesstyret Lokallag utan SU-lag Vestland SU
4	SU skal inviterast til å halde antirasistisk skulering.		
5	Invitere SU til å halde eit formøte.		

Status for desse tiltaka:

Det er gjennomført eitt AU+AU-møte med Vestland SV og Vestland SU. Berre fylkesleiar deltok frå SV, medan SU hadde ein breidare representasjon. Tema på møtet var stoda hjå SU, nytt kontor og deltaking i nemnder før og under fylkesårsmøtet.

Fylkesleiar i SU Andreas Liheim møter jamnleg på fylkesstyremøta og orienterer frå Vestland SU.

Me har ikkje klart å stable på beina ordninga med at SU-arar utan lokallag skal inviterast til aktivitet i SV-laget dei soknar til og me veit heller ikkje kor mange dette eventuelt gjeld.

Tiltaket med at SU skal halde eit formøte vart lagt vekk. SU sentralt har signalisert at ein ikkje tenkjer det er ei god løysing å halde formøte for SV og det er ikkje gitt at det er ei god løysing for oss heller å setje arbeidet med organisasjonskulturen vår ut til andre.

Delmål: Støtte Sosialistisk ungdom til å vinne skulevalet

Sosialistisk Ungdom skal få god støtte under skulevalkampen og saman skal me vinne han!

Tiltak		Gjennomføring	Ansvar
1	SU organiserer og gjennomfører skulevalkampen og ber om hjelp frå SV om det trengst.	I samband med skulevalkampen	Vestland SU
2	Fylkessekretær skal vere tilgjengeleg for å finne sjåførar og anna logistikkhjelp for å gjennomføre skulevalkampen.	I samband med skulevalkampen	Fylkessekretæren

Status for desse tiltaka:

SU leverte ein svært god skulevalkamp og deltok i debattar på så godt som alle dei vidaregåande skulane i fylket. I stor grad sto SU sjølv for planlegginga og logistikken rundt dei ulike debattane, men der SU spurde om bistand, fekk dei hjelp med transport og overnatting.

Året som var

Fylkesårsmøte

Fylkesårsmøtet 2025 vart helde på Vestlandshuset i Bergen, 8. og 9. februar 2025. 97 delegatar og 10 observatørar møtte på det meste.

Delegatane kom frå Alver SV, Askvoll SV, Askøy SV, Bergen SV, Bjørnafjorden SV, Eidfjord SV, Kvinnherad SV, Kinn SV, Lærdal SV, Osterøy SV, Sogndal SV, Solund SV, Stad SV, Stord SV, Sunnfjord SV, Sveio SV, Tysnes SV, Ullensvang SV, Ulvik SV, Vaksdal SV, Voss SV, Øygarden SV, Vestland SU og fylkesstyret.

Fylkesstyret

Fylkesstyret har hatt 11 styremøte i perioden 2025-26, og handsama 159 saker. Året starta med eit styreseminar over to dagar i Bergen. Fylkesstyret har hatt eit utvida styremøte 17. desember, der representantar frå lokallag og bydelslag vart invitert. Tema for det utvida møtet var strategiprosess i partiet, og årsmøtesesong i lokallaga.

Medlemmane i fylkesstyret har vore:

- Jarle Brattespe, fylkesleiar
- Vibeke Johnsen, politisk nestleiar
- Eva Mikkelsen, organisatorisk nestleiar
- Asle Olsen, økonomiansvarleg
- Jens Revold, miljøpolitisk ansvarleg
- Knut Remi Heimvik, fagleg ansvarleg
- Erle Liliane Wesenlund, kvinnepolitisk ansvarleg
- Kai Øystein Søvde, distriktspolitisk ansvarleg
- Silje Nordtveit Olsen, folkevaldansvarleg
- Mari Svartveit Hansen, styremedlem
- Milkissa Chimdessa Wodajo, styremedlem
- Bente Nilsen, styremedlem
- Marianne Sæhle, gruppeleiar i fylkestinget
- Marthe Hammer, stortingsrepresentant
- Andreas Liheim, representant for Vestland SU

Marthe Hammer møtte i fylkesstyret som gruppeleiar i fylkestinget fram til oktober. Etter dette haldt ho fram som stortingsrepresentant, medan Marianne Sæhle gjekk inn som ny representant frå fylkestingsgruppa. Ved einskilde høve har fylkestingsgruppa sendt andre representantar til fylkesstyremøte.

Arbeidsutvalet

Arbeidsutvalet har hatt 19 AU-møte i perioden 2025-26. I tillegg har utvalet hatt eit møte med arbeidsutvalet i Bergen SV, og eit møte med leiinga i Vestland SU.

AU-møta nyttast for det meste til å førebu fylkesstyremøta, følgje opp aktuelle saker og vedtak frå fylkesårsmøtet eller i fylkesstyret. Samarbeidet i AU har vore godt.

Medlemmane i arbeidsutvalet har vore Jarle Brattespe, Vibeke Johnsen, Eva Mikkelsen og Asle Olsen. Aslak Owren har vore sekretær for Arbeidsutvalet.

Valnemnd

Valnemnda har bestått av Veronicka Ruud, Steinar Øydvin, Bente Nilssen Owren, Frøydis Olaussen og Gjermund Lygre Kongsvik. Vestland SU har også hatt ein plass i valnemnda, men ingen har deltatt på deira vegner. Veronicka Ruud gjekk ut av nemnda før arbeidet starta og Steinar Øydvin tok difor over som leiar.

Revisorar

Revisorane har vore Hege Bjørnør og Lasse Turøy, med Einar Gautefall som vara.

Folkevalde

Etter kommune- og fylkestingsvalet i september 2023 er SV representert i 30 kommunestyre i Vestland, ein meir enn førre periode. me har 69 kommunalt folkevalde og 5 representantar i fylkestinget, ein auke på 12 folkevalde samanlikna med førre valperiode. I 2024 meldte vår kommunestyrerepresentant i Bremanger seg ut av SV og me stod då utan kommunestyrerepresentant i Bremanger. I 2025 meldte ein kommunestyrerepresentant frå AP i Bremanger overgang til SV og me er no representert i 30 kommunestyre i 2025.

Stortingsvalet i 2025 førte til endringar i fylkestingsgruppa i Vestland då Marthe Hammer vart vald inn som stortingsrepresentant. Etter ny konstituering i oktober vart Marianne Sæhle vald som gruppeleiar, medlem i fylkesutvalet og medlem i hovudutval for næring. Vidare er Åsmund Berthelsen, leiar i Hovudutval for opplæring og kompetanse. Alexander Papas er fylkestingsmedlem og medlem i hovudutval for samferdsle. Hege Lothe er fylkestingsmedlem og medlem i hovudutval for opplæring og kompetanse. Ny frå 2025 er Symphorien Pombe som er medlem i fylkestinget og medlem i hovudutval for kultur, idrett og inkludering.

Våre heiltidsfolkevalde er: Marthe Hammer, stortingsrepresentant frå Hordaland valkrins. Marianne Sæhle gruppeleiar og medlem av fylkesutvalet i Vestland fylkesting. Åsmund Berthelsen, leiar i Hovudutval for opplæring og kompetanse Vestland fylkesting. Mikkel Grüner, gruppeleiar, nestleiar i Utval for barnehage, skole og idrett, og medlem i Forretningsutvalet i Bergen bystyre.

Andre folkevalde med større frikjøp eller verv: Diane Berbain, AU-medlem i Utval for helse og sosial i Bergen bystyre og Kjartan Haugsnes, varaordfører i Vaksdal.

10 av våre 70 folkevalde i kommunane sit som einaste representant for SV.

Nasjonale utval

Samepolitisk forum og råd

SV sitt samepolitisk forum er SV sitt nettverk for medlemmer i partiet som ynskjer å jobbe med samspolitiske saker. Forumet bidreg til SV sine folkevalde i samepolitiske spørsmål, og er ein verkstad for utvikling av SV sin samepolitikk. Annakvart år vert det arrangert samepolitisk konferanse. Alle kan delta, men det er berre medlemmer i samepolitisk forum som har røysterett. Samepolitisk konferanse er forumet sitt høgste organ, og gjer vedtak om kva samepolitisk kurs SV skal ha. Konferansen kjem med innstilling til medlemmer til SV sitt samepolitiske råd, som er styre for forumet.

Eva Mikkelsen og Ragnhild Freng Dale har vore varamedlemmer i Samepolitisk råd. Eva Mikkelsen vart gjennom suppleringsval 23.09 fast medlem.

Samepolitisk råd har organisert arbeidet med samepolitiske saker og spørsmål i valkampen. Hovudarbeidet i 2025 har likevel vore oppfølging av Sannhets- og forsoningskommisjonen sin rapport. Eit arbeid som vil fortsetje i 2026.

Bergen SV v/ Bystyrerepresentant Eira Vilde Martinsen Garrido hadde og eit representantforslag om Samiske stadnamn i Bergen i april 2025: Bergen kommune - Møter og sakskart politiske utvalg

Sentralt Miljøpolitisk utvalg

Det sentrale miljøpolitiske utvalet har to medlem frå Vestland, Ragnhild Freng Dale og Kerim Nisansouglu. Kerim, som sit i begge utvala, har orientert Vestland SV MPU om kva som rører seg i det sentrale utvalet.

Jens har som leiar delteke på to av tre møte i Sentralt MPU sitt nettverk for miljøkontaktar i fylka. Kontakten mellom MPU Vestland SV og sentralt MPU kunne vore betre!

Landsstyret

Landsstyret har hatt 9 møte i perioden. Det har vore ordinære møte 4. mars, 13. mars, 24. og 25. mai, 19. og 20. september, 21. og 22. november og 16. og 17.

januar. I tillegg var det ekstraordinære landsstyremøte 21. mai for å diskutere revidert nasjonalbudsjett og satsinga på gratis barnehage, 29. oktober for å diskutere oljefondet og Palestina og budsjettforhandlingane og 29. november for å diskutere brot i forhandlingane om statsbudsjettet.

Fylkesleiar Jarle Brattespe og politisk nestleiar Vibeke Johnsen er Vestland SV sine faste representantar i landsstyret og har møtt på dei fleste møta. Varalista i rangert rekkjefølgje er: Eva Mikkelsen, Kai Øystein Søvde, Milkissa Wodajo og Silje Nortveit Olsen. Milkissa Wodajo har møtt på to møte.

Fylkeslaget har også andre medlem som møter i landsstyret. Gina Barstad og Steinar Nørstebø som høvesvis fast representant og vara til sentralstyret møter fast i landsstyret. Mari Svartveit Hansen er vara for funkisnettverket og møtte i landsstyret 16. og 17. Januar. Hege Lothe er nestleiar i EU/EØS-utvalet, men har ikkje møtt i landsstyret denne perioden.

Tilsette

Fylkeslaget har to tilsette: Fylkessekretær Aslak Owren og organisasjonskonsulent Sigrid Sandal. Organisasjonskonsulenten deler sin arbeidstid likt mellom Vestland SV og Bergen SV. Begge er fast tilsett i full stilling, med SV sentralt som arbeidsgjevar og med lokale tillitsvalde som sine arbeidsleiarar. Dei jobbar på partikontoret i Bergen.

Dei tilsette er involvert i det meste som skjer i fylkeslaget, og har også oppgåver for fylkestingsgruppa. Gjennom året har dei delteke på fire samlingar for tilsette hjå SV sentralt.

Aslak Owren var i permisjon frå 25. november 2024 til 25. april 2025. I det same tidsrommet var Sigrid Sandal vikarierande fylkessekretær. Vestland SV hadde inne Andreas Madsen Berg som tilsett vikar 17.03.-25.04.

Lokallag

Vestland SV er fylkeslag for 30 lokallag. Talet har ikkje vore endra i 2025, men det har vore noko etterarbeid frå nedlegginga av 4 lokallag i 2024.

Fylkeslaget arrangerte eit lokallagsleiarforum 17. juni med valkamp som tema. Elles har valkampgruppene for Hordaland og for Sogn og Fjordane invitert lokallaga i dei to valkrinsane til kvar sine møte for å vedta lokale valløfte. Møtet for Hordalands-laga var 11. mai, og møtet for Sogn og Fjordane-laga var 27. mai.

Medlemstala fordelt på lokallag per 31.12.25 var slik:

Vestland SV	2059	Lærdal SV	21
Alver SV	39	Osterøy SV	17
Askvoll SV	16	Sogndal SV	103
Askøy SV	63	Solund SV	6
Bergen SV	1052	Stad SV	39
Bjørnafjorden SV	55	Stord SV	71
Bremanger SV	9	Sunnfjord SV	74
Bømlo SV	19	Sveio SV	23
Eidfjord SV	11	Tysnes SV	17
Fjaler SV	22	Ullensvang SV	28
Gloppen SV	31	Ulvik SV	13
Høyanger SV	14	Vaksdal SV	28
Kinn SV	45	Vik SV	13
Kvam SV	24	Voss SV	66
Kvinnherad SV	35	Øygarden SV	51
Luster SV	12	Utan lokallag	42

Digital kommunikasjon

Vestland SV har ei facebook side med 3800 følgjarar og ein instagram profil med over 1000 følgjarar, der det blir publisert jamnt ting kvar veke. I valkampen fleire innlegg om dagen. Begge kontoar deler innhald av og om fylkestingsgruppa, meningsinnhald frå folke- og tillitsvalde, kommunikasjon frå SV sentralt og innhald om merkedagar og jubilarar.

På Facebook har sida fått rett i underkant av 300 nye følgjarar og innhaldet vårt har 1.3 millionar visningar i laupet av året. I perioden kring valkampen (1. Juli – 1. oktober) hadde sida nærmare 900.000 av visningane.

Nettsidene vart brukt aktivt i valkampen som landingssider for annonser og qr kodar på klistremerker. Ellers har nettsidene ikkje vore utsett for større prosjekt. Nyheitsbrev funksjonen i zetkin har kome betre i bruk i laupet av året.

Valkamp

Det viktigaste og største prosjektet for Vestland SV i 2025 var utvilsamt valkampen i høve stortingsvalet. I Vestland inneber det valkamp i to valkrinsar, med eigne valkampgrupper og kandidatar i både Hordaland og i Sogn og Fjordane.

I Sogn og Fjordane var toppkandidaten Hege Lothe, med Alice Hestad Vie som andrekandidat. I Hordaland var Marthe Hammer fyrstekandidat, med Alexander Papas som andrekandidat.

I stortingsvalet gjekk SV att både nasjonalt, og i dei to valkrinsane i Vestland. Nedgangen var særleg merkbar i Hordaland valkrins, og i Bergen kommune.

Område	Prosent 2025	Prosent 2021	Endring 2021	Røyster 2025	Røyster 2021	Endring 2021
Nasjonalt	5,6 %	7,6 %	- 2,0 pp	181 192	228 063	- 46 871
Hordaland	5,8 %	8,9 %	- 3,1 pp	18 875	26 901	- 8 026
Sogn og Fjordane	4,3 %	6,0 %	- 1,7 pp	2 725	3 675	- 950
Bergen	7,4 %	11,4 %	- 4,0 pp	13 068	18 710	- 5 642

Valkampene i begge valkrinsar har hatt god aktivitet, og innsatsen frå kandidatar, tillitsvalde, folkevalde tilsette og medlemmer har vore enorm. Fylkesstyret har hatt ein omfattande evaluering av valkampen. Lokallaga har også hatt høve til å melde syn på valkampen, i eit heller omfattande spørreskjema. Det har kome mange nyttige meldingar der, og elles. Fylkesstyret tek med seg lærdommane derfrå i planlegginga av valkampen 2027.

Sett under eitt er dei netto valkampkostnadane 605 645. Brutto er talet 1 121 847. Det har vore god budsjettdisiplin i valkampgruppene, og meirforbruket er på berre 55 645,14.

Det kom til saman inn 516 201 i refusjonar, bidrag og liknande. Av dette er 185 000 kroner bidrag frå fagrørsla, 140 000 kroner søknadsbasert valkampstønad frå SV sentralt, 30 000 kroner støtte frå SVs organisasjonsfond og 161 201 kroner ulike refusjonar i Hordaland frå lokallag, partiet sentralt og andre.

Landsmøte

SV's 26. Ordinære landsmøte gjekk av stabelen 14. - 16. Mars på Youngstorget i Oslo. Frå Vestland SV reiste fylgjande delegatar og observatørar:

Ivar Stefansson, Marthe Hammer, Eva Mikkelsen, Eira Garrido, Mikkel Grüner, Alexander Papas, Salman Chaudhry, Ingrid Eggereide, Zohar Malamant, Frøydis Olaussen, Yvonne Nshimirimana, Gaute Losnegård, Mari Svartveit Hansen, Asle Olsen, Hilde Hauglid, Arild Iversen, Silje Nordtveit Olsen, Kjartan Haugsnes, Jona Kvale Svenbalrud, Ragnhild Freng Dale, Diane Berbain, Marita Nikolaisen, Craig Bøthun, Lasse Turøy Kai Øystein Søvde, Gabriel Steinsbekk